

Glenbert Croes den su discurso Tantén cu memoria di Betico Croes ta na bida, e ta un inspiracion y garantía pa porvenir di nos generacionnan

ORANJESTAD

Celebracion di Dia di Betico e biaha aki tin un toke special, pasobra esaki t'e promé di e siglo nobo.

Durante e acto protocolario conmemorando e fecha natalicio di Betico Croes, su jiu mayor, Glenbert a hiba palabra na nomber di famia, recordando cu si su tata awe ta na bida, e lo a cumpli 62 aña.

Dia di Betico, no ta un sin mas, manera tur e otronan, maske tur tin su toke special, pero e ta e promé Dia di Betico cu ta worde celebrá den e siglo nobo.

Esaki ta trece un responsabilidad hunto cuné n'e dia aki na momento cu nos tur, nan como jiu, pero hopi di esnan presente cu a biba serca di dje y ta na bida, tin riba e dia aki e responsabilidad grandi di confirmá cu nos como pueblo berdaderamente ta considerá e gran homber aki nos Libertador, y loke su bida y lucha a nificá pa nos, obviamente nos tin e responsabilidad di bai garantizá cu e futuro generacionnan, pa nan ta consciente di loke bida di nos Libertador a nificá pa Aruba, segun Glenbert Croes den su discurso.



Lider di Ola, Glenbert Croes

Ta di balorá e importancia cu su lucha, sacrificio y su logro ta bai tin pa futuro di nos país. Betico Croes a hiba un bida yen di simbolismo.

Segun Glenbert Croes, su tata ta kere den simbolonan, cu a compañá su bida, for di tempo cu e tabata estudiante y despues cu el a bin Aruba, tuma e tarea di maestro di scol, yudando nos

hobennan den nan formacion, pa despues el a haya e yamada p'e drenta política.

Y for di comienzo di su promé dianan, Aruba tabata bibando formacion di un gran luchador pa nos pueblo, cu pueblo a depositá y speranza den su man. Betico Croes a lanta su partido, cu tabata su vehículo pa cual el a lucha p'e causa y anhelo di

nos pueblo, cu tabata nos libertad.

Betico Croes a sa di unificá nos pueblo tras di e causa di libertad. Por corda riba e Revolucion Arubiano na aña 1977, a bin cu un referendum, unda a keda registrá anhelo di pueblo, pero tambe el a conocé atentado contra su bida, el a bai será, pero apesar di tur esaki, el a percurá p'e candela cu tabata latente den curazón di tur Arubiano, bira mas grandi.

Un di dianan cu Glenbert Croes ta considerá di mas nificacion den historia di Aruba, tabata momento cu nos himno, bandera y escudo a bira e inspiracion y motivacion pa henter e pueblo aki.

Pesey cada momento cu un Arubiano mira e bandera di Aruba, tende of canta su himno y mira e escudo, tabata sa cu un

dia nos mester ta liber un dia.

Esaki tabata e caso tambe, ora cu dia 1 di Januari 1986, Betico Croes a percurá p'e libertad di e pueblo aki, pero lamentablemente e mes no por a mira su mision cumpli y Todopoderoso a yamé den su Reino pa cumpli cu otro mision.

Pesey esnan cu a keda atras, mester asumí e responsabilidad pa garantizá e Status Aparte di Aruba y garantizá un mihor porvenir pa nos país, segun Glenbert Croes.

Si algo nos por haci pa Betico Croes, ta p'awe nos tur, pero tambe nos futuro generacionnan lubidé, pasobra tantén cu su memoria ta na bida, e lo ta inspiracion y garantía p'esnan cu ta bai garantizá un mihor porvenir pa nos país, cu ta nos futuro generacionnan, tabata paia branan di Glenbert Croes.

Minister Willem Vrolijk, na entregamento di plakaat di reconocimiento a pidi Ban sigui cu ehempelnan cu Betico Croes a laga atras

ORANJESTAD - Minister di Cultura, Dr. Lili Beke-Martinez, kende tabata atendé un reunion na Bahamas, no a logra bin na tempo pa conmemorá Dia di Betico, pa motibonan fuera di su alcance pa cual el a pidi su disculpa.

Tabata ayera mainta, cu el a pidi Minister Willem Vrolijk pa cumpli cu su parti n'e ocasion aki.

Awe pueblo ta conmemorá cu 62 aña pasá famia Panchico y Ninita, q.e.p.d., a worde bendicioná cu un jiu homber, cuné momento nan no tabata sa

cu e lo bira e estadista mas grandi cu Aruba a conocé y cu e baby ey lo bira Libertador di e isla aki.

Betico, awe den feliz memoria, a bira e jiu mas stimá di nos baranca. Su ehempelnan cu el a laga tras ta hopi, segun Minister Willem Vrolijk y nos mester sigui nan.

Semper Betico Croes tabata respet pa políticonan cu a iniciá cu e lucha pa nos separacion. Incluso den su oficina y residencia na Cumana, e tabatin potretnan grandi di Shon A Eman colgá, na honor p'e lucha cu el a hiba pa nos separacion,

segun Minister Willem Vrolijk.

Betico Croes berdad no a cumenzá cu e lucha, pero el a logra di gana e bataya pa nos, logrando nos Status Aparte.

Luna pasá Parlamento a reconocé Libertador Betico Croes como Personahe di Siglo 20, y ayera mainta, Minister Willem Vrolijk a haci entregá di un plakaat di reconocimiento na Glenbert Croes, despues na Presidente di Parlamento, Mr. Eddy Croes y uno na Promé Minister Mr. Henny Eman, cu e peticion p'esakinan haya un bon lugar pa pueblo keda recordá e gran lider aki.

Ponemento di krans



ORANJESTAD - Sra. Vda. Glenda Croes y su jiu homber, Junior den representacion di famia Croes a pone e ofrenda floral n'e estatua di Betico.

Manera ta conocí otro aña, e estatua aki lo no tey mas, pero lo tin un otro mas grandi, mientras cu esaki lo haya un lugar special na Santa Cruz.